



VENERABILES FRATRES.



QUAM bonum sit confidere in Domino, VENERABILES FRATRES, splendidissimum exhibet argumentum ea, quæ inter sævientes procellas aura prodiit securior, ob quam repletum est gaudio os nostrum, & lingua nostra exultatione. *Iusta enim & rationalis est causa gaudendi,* ait Leo Magnus, *cum a Sacerdotibus Domini ea gesta cognoscimus, quæ & paternorum canonum regulis, & apostolicis congruunt institutis (a).* Magno munere Divinæ Misericordiæ multiplicata sunt gaudia totius Catholicæ Ecclesiæ: Quippe studio Venerabilis Fratris, Clementis Wenceslai, Archiepiscopi Trevirensis, & S. R. I. Principis Electoris, quem sine summa laude nominare non possumus, perniciosissimi errores extincti sunt, & in victoria veritatis dudum falsa dogmata perierunt. Non ignoratis plane, quæ & quanta intulerit damna Joannes Nicolaus Episcopus Myriophytanns, Ecclesiæ Trevirensis Suffraganeus, cum ab Anno Millesimo septingentesimo sexagesimo tertio, sub ementito Justinii Febronii nomine, Libros edidit, quibus, ut impugnaret hujus S. Sedis Jura, veritus non est Ecclesiæ ipsius Unitatem dissolvere (b). Modo idem Archiepiscopus pro Religionis ardore, quo incensus est, pro pastorali, qua maxime valet,

(a) *Epist. 36. part. Oper. Edit. Tyrnav. 1767.*

(b) *Libri Justinii Febronii prohibiti fuerunt Decret. Congregat. Indicis 27. Febr. 1764. 3. Febr. 1766, 24. Maii 1771, 29. Mart. 1773.*

Sächsische
Landesbibliothek
- 5. MRZ. 1965
Dresden

9